

Dia 25 di Januari ta un dia nacional cu ta celebra Dia di Betico

Ken ta Gilberto Francois "Betico" Croes

Desde aña 1989, tur aña dia 25 di Januari Aruba ta celebra dia di Betico. Esaki ta un dia nacional caminda a dedica na un gran yiu di tera cu a marca historia pa Aruba. A scoge e fecha aki como cu e ta e fecha natal di e gran estadista Gilberto Francois (Betico) Croes.

Di e forma aki Aruba por dune su homenahe bon mereci y asina un y tur por keda recorda su lucha pa a logra Aruba su Status Aparte. E lucha aki a marca historia.

E dia aki ta wordo celebra y recorda na un manera hopi especial caminda di esnan cu a conoce e persona aki di cerca ta reflexiona ariba e dia aki con grandi e persona aki tabata pa Aruba. Pero hopi tambe no sa kende tabata Gilberto Francois "Betico" Croes.

Nan ta tuma e dia aki como un simpel dia liber, pero sin sa pakico berdaderamente nos tin e dia liber aki.

For di noticianan copia DIARIO ta trece un historia breve di e gran persona aki cu a significa hopi pa e pais Aruba pa su lucha incansabel pa cada Arubiano por a sintie un Arubiano den su mes un cas y cu a uni un pueblo pa asina nan sigi stima nan pais y nan hendenan.

Gilberto Francois Croes, mihor conoci como Betico a nace dia 25 di Januari 1938. Su mayornan ta Francisco "Panchico" y Mimita Croes-Lopez. For di chikito e tabata un persona hopi stima ya cu e tabata cla pa yuda tur hende. Despues di a bishita school basico St. Jozef School el a bay St. Dominicus College el a termina su HBS. Despues Betico a bay Hulanda pa studia pa maestro di school caminda na aña 1959, el a haya su Hoofdakke como maestro.

Di regreso na Aruba, el a fungi como maestro di school na e mesun school unda el a bay school basico cu ta St. Jozef School te na aña 1969. Durante su tempo liber el a sigi studia y a logra su aktenan LO den Spaño y Handelskennis caminda despues el a bay duna les na St. Antonius College. E tabata un persona social y tabata un maestro hopi stima pa tanto e alumnonan como nan mayornan y e comunidad. Su mensahe na e alumnonan semper ta pa studia bon pa despues bo por bin traha pa e pais Aruba.

Dia 18 di December 1962 Betico a casa cu Glenda Croes cual matrimonio a

wordo bendiciona cu cuater yiu Glenbert, Guisette, Junior y Glendeline.

Como un tata ehemplar Betico semper a stima su yiunan y pa e yiunan e poco momentonan cu nan a pasa cu nan tata tabata inolvidable.

Pero Betico no tabata destina pa keda maestro ya cu e kier a hiba Aruba mas leu. Asina Betico tabata tin hopi interes den politica mundialmente, e tabata sigui tur historia di politiconan di entre otro Hulanda y Antiyas Hulandes y tambe Venezuela. Y poco a poco Betico tabata sinti cu e kier pa cada Arubiano sinti su mes orguyoso di ta Arubiano.

Ta pesey destino a hacie e homber cu lo a rebiba y realiza e lucha di un pueblo pa libertad. Na aña 1967 e ta dreठा mundo politico, cu hamas lo a bira igual. Ora cu AVP a pidi pa subi ariba nan lista el a acepta y a haya number 5. Y e mesun aña dia 1 di Juni 1967 el a bira Diputado en-carga cu enseñanza, Asunto General y personal, registro civil y Biblioteca Nacional. Y poco a poco e popularidad di Betico a crece y tur hende tabata admire pa su curashi y pa e caracter cu e tin. Cu esaki tambe el a trece un union den e pueblo ya cu e tabata traha tur hende igual, no ta importe religion, ni color politico, ni raza pe tur tabata Arubiano. Y mester bisa cu el a hasta sacrifica su famia pa su isla natal cu tanto el a stima Aruba.

Despues di problemanan interno encuan-to liderazgo di AVP, Betico a bandona e partido. Dia 9 di Februari el a funda su mesun partido Movimiento Electoral di Pueblo, MEP.

Ya durante e prome eleccion na cual e partido a participa, MEP a sa di haya 7 asiento di e total di 21 den Eilandsraad. Na 1975 Betico Croes cu su partido a haya e mayoria absoluto y asina a cuminsa e periodo di diez aña, durante cual Betico Croes tabata tin e timon di Aruba den su man. Betico tabata e politico cu a enfrente publico ariba plataforma internacional pa vocifera e mensahe di e pueblo di Aruba. El a saca Aruba for di e isolacion insular, pa presente dilanti e pueblonan di mundo como e isla, cu a deshaci di su tamaño fisico pa acepta un tamaño estatal, marca pa e corahe di kier a tuma su destino den su propio man. Su curazon tabata grandi pa logra cosnan grandi pa Aruba. Pero e tabata un lucha

duro cu a lo largo di tempo el a dicidi di retira. Dia 22 di November 1985 durante un homenahe dedica na su persona den Ser'i Noka, Betico tabata hopi emocionada y tabata manera cu e tabata tuman-do despedida di su pueblo ya cu ningun hende no por a imagina cu algun ora prome cu 12'or a bati pa cambio di aña Betico a haye envolvi den un accidente sumamente

Sigui Lesa Pag. 11




Continuacion Pagina 10



serio. El a keda den coma pa 11 luna largo caminda su lucha a termina dia 26 di November 1986 ora el a fayece na Hulanda. Henter Aruba a yora su morto y e entiero tabata uno hamas bisto na Aruba caminda tabata tin filanan largo pa despedi di e gran persona aki y caminda por a mira miles di persona na yoramento.

Si su bida tabata yena cu emocion, cu accion, tranquilamente, cu un sonrisa ariba su cara, el a muri leo for di su cas, for di su pais, caminda su Pueblo ta yore! Su fecha di nacimiento 25 di Januari dia 7 di April 1992 pa medio di un landsbesluit a keda decreta como un fecha nacional pa asina keda recorda e persona aki como un



di nos gran baluartenan. Na Mei 1998 a proclama Betico oficialmente "Libertador" di Aruba. Y na Decemer 1999, Staten unanimamente a declara Betico como: Person-ahe di Siglo.

Un di e expresionnan di Betico tabata "Mi sa cu despues cu nos no tey mas, historia lo determina kico ta e rikeza inmateral cu nos a laga atras

pa nos criaturanan".

Betico e homber simpel di pueblo

E liderato di Betico Croes tabata uno di un Arubiano di puro sepa, cu tabata dirigi su Pueblo. Pero na mes momento, un cambio drastico a worde introduci pa Pueblo.

Betico Croes tabata e mucha di campo, cu a bay dirigi su pais. El a duna e homber di campo dignidad y e palabra aki tabata sali dilanti cada bez cu el a trece su mensa-henan na Pueblo.

Pueblo a identica su mes cu Betico Croes, cu tabata tin su siguidorinan den tur barío y distrito na Aruba. Pero sin duda el a keda na promer lugar e homber di Santa Cruz, cu a sostene te na ultimo. Betico semper tabata tin hopi dedicacion pa hobennan caminda e tabata educa y prepara nan pa nan futuro y tabata siña nan e balor di nos cultura y identidad.

Betico a presenta cara di un politico nobo, cu no tabata conoce un distincion pa loka ta trata hendenan di campo, ya cu e mes tabata di campo. Aunke e tabata ocupa e funcion clave den gobernacion, el a keda semper Betico, y como tal a dirigi e Pueblo, realizando logronan den arena politico, cu tabata dificil pa iguala.

Betico tabata un lider, cu su propio forma di dirigi e masa, cu a confie y a pone den su man destino di Aruba, futuro nobo di un isla cu tabata lucha pa su libertad. E por papia oranan largo y sin papel y e pueblo semper ta para scuche cu hopi atencion. Y cu tur e pesonan aki cu e tabata tin ariba su lomba e tabata un persona simpel y cu un charisma grandi cual a conquista curazon di henter e pueblo.

Simon Bolivar tabata un di esnan cu e tabata admira y tanto den su discursonan como den su biblioteca sem-

per Bolivar tabata presente. Talbez Betico a idea cu e, mescos cu Bolivar, lo no a mira realizacion di un libertad?

Betico a confronta tambe cu e cierre di Lago

Durante gobernacion di Betico economicamente Aruba a progresa. Pero na aña 1984, Betico Croes a worde confronta cu e problemanan di mas grandi cu por a imagina. E alma economico di Aruba, Lago, a dicidi cu e ta cera porta y esey lo a significa cu Aruba di un dia pa otro lo mester a custumbra na e idea cu bonanza a pra y cu cosnan lo bira diferente.

Betico nunca kier a acepta cu Lago lo a cera su porta y a cuminsa cu un serie di viahe di negociacion pa mira si e por tene Lago habri. Pero no tabata posibel y e mester a mira con algun luna prome cu Aruba lo bay urna electoral pa eligi un Gobierno cu lo a hiba e pais Status Aparte, e refineria a cera su portanan.

Cierre di Lago tabata e impacto cu a sigui manifesta su mes den comunidad, cu tabata prepara pa Status Aparte. Tabata tin voznan ta lanza pa pospone pa Status Aparte, pero Betico Croes a bisa cu no. El a demostra audacia di sigui persigui e moneda propio di Aruba, aunke tur caminda tabata worde muestra cu situacion economico tabata deteriora, y cu e moneda lo por a fracasa. Ta akinan tambe a dicidi di implementa e 8 2% ariba e pueblo trahador pa e caha di gobierno por cumpli cu tur gasto caminda cu e pueblo a caba di haya e sla duro cu Lago a cera.

Den su lucha tambe pa haya Status Aparte, Betico a pasa den yen di contratiemponan, pero manera un politico balente el a sa di vence tur obstaculo. Aruba a conoce dianan scur pero cu Betico na timon, Aruba e vence tur

Sigui Lesa Pag. 12

Continaucion Pagina 11

obstaculo. Unda cu Betico a bay e pueblo tabata su tras. Asina den tur e contratiemponan tambe el a haye cera inhumtamente pa motibo di un arma cu no tabata funciona cu a wordo haya den su auto. Pueblo a bay masalmente cu Betico pa prison y Danki Dios cu Betico no a keda cera pa largo ya cu pueblo lo no a permiti esaki.

“Coy e bandera y sigui dilanti, semper dilanti”.

“Coy e bandera”. Palabranan cu tabata worde expresa pa Betico Croes, na momento di problema, di emocion; na momento cu ningun hende lo por a compronde otro palabra. Pasobra e frase tabata tin su propio contenido. E tabata bisa tur loke Betico Croes tabata kier expresa y tur loke pueblo kier a tende: Tene na e bandera, na Aruba, y sigui dilanti, semper dilanti.

Coy e bandera: palabranan cu ta describi Betico Croes, kende tabata algo mas cu un politico. Betico Croes tabata e homber, cu a sa di hinca den su Pueblo e orguyo franco di ta Arubiano. El a puli e sentimentonan patrio cada bez cu problema, decepcion o desaroynan menos positivo, tabata menaza di kibra animo. Aruba tabata forza di Betico Croes y Betico Croes pa Aruba tabata representa e forza, e punto di sosten cu Pueblo tabata busca pa realiza su plan mas ambicioso: su libertad!

Coy e bandera: e palabranan cu a duna Betico Croes tambe e empuhe, manera lo sali dilanti ora sigui e momentonan crucial cu e mester a pasa aden. Kico a biba cerca e hende Betico Croes, ora henter un Pueblo tabata atento pa su palabranan, pa e direccion cu e mester a duna?

Pa esnan cu a conoce Betico Croes mas di acerca, ta conoci cu Betico Croes tabata busca su forza den Dios y Patria. Si, Betico Croes tabata asina convenci pa e hecho cu tin uno mas grandi cu tur; uno cu tabata rigi destino, uno cu tabata dicidi. Talbez por a parce de bez en cuando cu e tabata hunga politica cu e sentimento aki, pero en realidad, Betico tabata convenci di e forza cu e como hende, mester a busca mas ariba y e no tabata tin berguenza di expresa su mes den tal direccion; di demostra cu e ta kere den Dios!

Despues a bini su Patria: Aruba. Solo por a keda sin sali e dia; nubianan scur por tabata tapa horizonte, pero na

momento cu Betico a papia di Aruba, ta comosifuera e mal tempo mas pisa, mester a apacigua pa e lucha por a continua. Aruba: e interes total cu Betico Croes tabata tin pa su pais. E aspectonan di mas chikito, bin biaha insignificante den bista di otro nan, tabata tin su atencion.

Betico Croes tabata un Arubiano y el a keda Arubiano. Aunke politica a hibe na nivelnan haltu, aunke su labornan a pone ariba plataforma internacional tanto biaha, e no a cambia su identidad como Arubiano. E tabata uno cu Pueblo: uno den su expresion, uno den su gustonan, uno den su tradicion, uno den tur loke tabata Aruba.

Aruba por a identifica su mes cu Betico Croes, e lider cu no tranca ariba pedestal. Esey a duna Betico e confianza di Pueblo, cu a haci di un homber, su punto di union, di mara forza, e nucleo di un lucha cu tabata tin mester di un capitan pa e por a logra.

Cuanto Aruba a exige di Betico Croes? No por papia solamente di e cantidad di oranan di trabao, cu tabata tene ariba pia hopi biaha sin descanso siquier. No por papia solamente di e energia cu a worde exige pa bula di un punto pa otro, drenta reunion sali sigui traha! No! Mester papia tambe di e responsabilidad enorme cu a worde poni ariba su lomba, cu el a acepta. E responsabilidad cu Pueblo a entregue y cu e mester a carga como simpel ser humano Betico a cargue. Betico a lucha, Betico a logra, pero lastimamente nunca a mira su logro.

Coy e bandera! Palabranan di Betico, cu a tene na e Himno, na e Bandera, na Aruba pa por a haci 1 di Januari 1986 bira realidad, sin sa cu e lo tabata esun cu lo duna entrada den Status Aparte un sabor amargo.

Coy e bandera! E mensahe cu Betico a laga atras. E frase cu Pueblo kier scucha y capta awe, cu nubianan di problemanan ta keda colga na cielo y solamente e bandera, e amor pa Aruba, ta haci Aruba sigui cana.

Coy e bandera, palabranan pa un Pueblo cu cada bez cu e mira e bandera, lo corda ariba un homber, un Arubiano, cu a entrega su pais, realizacion di su anhelo. Betico, descansa! Drumi tranquil, mientras Aruba ta trata di hamas lubida, cuanto a costa e logro cu bo a regale: su libertad!

